

La Quotidiana, 19.11.2012

Il Scuol Palace resta a la Friedman GmbH

Inchant dal Hotel Scuol Palace ha pudü gnir evità

DA BENEDICT STECHER / ANR

L'Hotel Scuol Palace a Nairs sül territori da Scuol es stat serrà las ultimas stagiuns causa insolvenza da la Friedman GmbH. Per l'ultim venderdi es gnü publichà da l'uffizi da scussiun En l'inchant da l'hotel. Cuort avant es gnü trat inavo la scussiun e l'inchant nun ha gnü lö.

Causa l'insolvenza da la Friedman GmbH deira previs venderdi passà l'inchant dal Hotel Scuol Palace a Scuol/Nairs. Fingià duos jadas avant deira gnü publichà ün inchant, ma adüna cuort avant es gnü trat inavo la scussiun e l'inchant. Il terz termin per ün inchant es gnü publichà aint il fögl uffizial per venderdi passà a las 15.00. Ün per uras avant l'inchant ha trat inavo il credader important, la Società simpla Clemgia da San Murezzan in possess da las famiglias Triacca e Testa la scussiun e la pretaisa d'inchantar, ha infuormà Otto Huber da l'uffizi da scussiun En. Sco cha Marcus Testa da la Società Clemgia ha infuormà ha la Friedman GmbH pajà a bunura dal termin da scussiun l'import restant pendent e la Società Clemgia ha retrat la pretaisa d'inchant. Tenor stima uffiziala ha l'Hotel Scuol Palace üna valur da raduond 6 milliuns francs ed ün inventar da 1.1 milliuns francs. L'hotel ha generà i'l temp cha'l Club Robinson deira fittadin tanter 30'000 e 40'000 pernottaziuns l'on e deira pel cumün da Scuol da grond'importanza.

L'istorgia da l'hotel a Nairs

Il Grand Hotel Kurhaus Tarasp, uschè gniva nomnà l'hotel Scuol Palace plü bod, es gnü inaugurà dal 1865 e deira in possess da la „Tarasp-Schulser-Aktiengesellschaft“ TSCHAG e deira quella jada ün dals hotels ils plü moderns in Svizra. Cun quai cha'ls cuosts da fabrica sun stats quella jada bler plü ots co previs staiva l'hotel sün üna basa finanziaria fich noscha. Dal 1869 es l'hotel i in fallimaint. Dal 1989 ha la „Società simpla Clemgia Tarasp“, hoz cun sez a San Murezzan, cumprà l'hotel ed investi ün import remarchabel ed as nomna daspö la Hotel Scuol Palace. Il Club Robinson chi d'eira quella jada fittadin dal Hotel Schweizerhof a Vulpera ha tut a fit eir l'hotel a Nairs e manà quel cun grond success. Sco cha'l responsabel dal Club Robinson, Toni Weibel ha tradi quella jada s'haja eir gnü trattativas cun la possessra per comprar l'hotel. Ma quellas sun idas ad aua causa chi nu's es gnü. Quella jada daperüna cul predschi.

Il Club Robinson ha bandunà l'Hotel Scuol Palace

Dal 2006 ha il Club Robinson bandunà l'hotel e la Società Clemgia ha tscherchà novs fittadins o cumpraders. L'hotel es stat ün temp serrà ed es gnü surtut bainbod da la Friedman GmbH chi spordschaiva vacanzas a Güdeus ortodox tenor lur reglas e tradiziuns. Eir quella ditta ha gnü problems finansials ed in marz dal 2010 deira previs l'inchant dal hotel. Quel ha pudü gnir impedi cun üna nouva funtana da munaida. Daspö diversas stagiuns es l'hotel stat serrà.

Prüma pagina

L'Hotel Scuol Palace resta a la Friedman GmbH

(anr/bcs) L'inchant dal Hotel Scuol Palace a Scuol/Nairs chi d'eira previs per venderdi passà nun ha gnü lö pervia chi'd es gnü trat inavo la scussiun e la pretaisa d'inchant. L'Hotel Scuol Palace chi vaiva nom al prinzipi „Grand Hotel Kurhaus Tarasp“ ha rivi sias portas dal 1865. Tal nun ha gnü be buns temps ed es i diversas jadas in fallimaint. Adüna darcheu ha quel chattà nouvs possessurs chi han tuots stuvü sucomber. La Friedman GmbH, la possessura actuala dal Hotel Scuol Palace, ha pervia da motivs d'insolvenza laschè serrà l'hotel las ultimas stagiuns. Cun quai cha ün pajamaint parzial invers la Società simpla Clemgia nun es gnü pajà ha quella pretais l'inchant dal Hotel Scuol Palace chi'd es gnü publichà aint il Fögl uffizial da l'uffizi da scussiun En. La Friedman GmbH ha pajà in venderdi a bunura l'import restant pendent ed ha pudü evitar la scussiun e la pretaisa d'inchant.

Fotos

Scuol Palace 004: L'Hotel Scuol Palace a Scuol/Nairs es ün uffant da pissers per la regiun.

FOTOS: B. STECHER